



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**28. Kalenderwoche – ab 12. Juli 2009**

## Asbesd in „das besde“

Ja, isch bin widdor ma in Bährlien gewähsn. In dor gesamddeudschn Haubdschdadt! So ee Mal im Jahr muss isch nach Bährlien. Das mach isch nu schon seid viele Jahre. Eenfach guggn, was dord so los is. Nisch dass isch dann dor Regierung direggd off de Fingor guggn wöllde... nee, da bassn die schon off, dass da keenor rischdisch droffguggn kann! Nee, bloß so allgemein – was so gebaud wordn is... wasse Aldes weggerubbd hamm... was ehm annersch is.

Am meisdenusch misch immor frein, wenn widdor was Scheenes dazugekomm is. So am Bodsammor Bladz zum Beischbiel – da kannsde bloß schdaun! Odor dor neue Haubdbahnhof! Odor ooch am Brenzlaur Bersch – Kneibe an Kneibe – e Lähm wie in Baris!

Nu muss isch abor diesma sachn, dass misch was geärschord had. In dor Mitte von Bährlien da is jedzde e rischdisches Loch. Dord, wo friehor dor Ballasd dor Reubligg geschdandn had. Odor – Erischs Lambnladn, wie de Leide gesachd hamm. Dähr fähld! Dähn hammse abgerissn!

Das is, wie wennse in Baris dähn Eifeldurm abgerissn hamm dädn! Odor in London de Dauorbridsch! Bloß guhd - dor Färnsähdurm schdehd noch! Goddseidank!

Offizjell hads ja geheeißn, dass dähr Ballasd weg muss, weschn Asbesd! Weil alles mid Asbesd gebaud wordn sein däde - dazumals. Währ das gloom dud...?!

Asbesd! Wennse dazumals werglisch so mid Asbesd rumgeaasd häddn, dann doch nisch bloß in Bährlien beim Ballasd dor Reubligg! Wenn mir dazumals ischendwie was gemachd hamm – ob nu was Feines odor mähr Scheiße – dann ham mir das fläschndeggend in alle Bezirge unndor

Anleitung un Offsischd dor Bardei gemachd! So wie mid de Bladdnbausiedlungen. Die warn vom Grundbrinzieb iborall gleisch. Un so is das dochooch bei de Balläde gewähsn. Ob nu das Gewandhaus in Leibzisch odor dor Guldurballasd in Drähsdn odor unsre Schdadthalle in Gemnidz... - die häddn se ooch alle wegrubbn missn! Weschn Asbeds!

Nee, dor Drähsdnor Ballasd wird umgebaud un renovierd. Unsre Schdadthalle, die wird jedzde umgebaud, ohne dass dor Bedrieb eingeschdelld wern dud. Wenn ma bißl Schdaub offgewirbeld wird... na, da missn de Midarbeidor un de Ginsdlor ehm ma Niesn un sisch de Nase budzn. Nischd mid Asbeds! Un das Gewandhaus is nach wie vor dor Schdolz von Leibzisch!

Bloß in Bährlien im Ballasd dor Reubligg, da hammse hindorhädischerweise Asbed neingemachd dazumals. Wahrscheinlich sinn das sogahr welsche gewähsn, die im Widorschdand warn. Reschiehmgesechnor! Welsche, die dor Bardei eens auswischn wolldn!

Nee, werglisch – da had de Schdasi damals nisch rischdisch offgebassd. Dass Asbed kee Zeusch is, was dor Gesundheit dien dud, das hammor ja schon vor dor Wende gewussd.

Nee, dor Ballasd war dord in dor Mitte drinne werglisch mid das Besde. Un in „Das Besde“ da dud ehm werglisch „Asbed“ drinneschdeggn. Schade drum!

**Eduard Sachsenmeyer**